

Maandag 5 Desember

Skrifgedeelte: Openbaring 7:9-17

Fokusgedeelte: Openbaring 7:14 (AFR83)

Hulle kom uit die groot verdrukking

Gister het ons gehoor dat daar 'n spesifieke getal mense (wat vir God bekend is) gemerk is en dat hulle God se uitverkorenes hier op aarde is. As jy waarlik in Christus glo (Hand. 16:31), dan is jy deel van hierdie gemerktes.

Vandag sien ons weer 'n groep mense. Maar hierdie groep mense staan voor die troon en die Lam. Hulle staan dus in die hemel voor God. Hierdie is nie maar net 'n groot groep van 60 000 soos by 'n rugbywedstryd nie, maar hierdie groep is ontelbaar. Hulle was van elke nasie, stam, volk en taal en hulle verteenwoordig die uitverkorenes wat reeds in die hemel by God is. Alhoewel hulle ontelbaar is, is dit almal wie se name in die boek van die Lewe geskryf is.

Die misterie is dat net die Here weet hoeveel hulle is en die troos is dat hulle almal aan Hom behoort. Johannes sien dat dit dié is wat uit die groot verdrukking kom (vs 14). Hierdie groep mense is dié wat getrou aan die Here gebly het en deur volharding en lyding die Here bly dien het (Op. 3:10).

Vir hulle gaan die Ou-Testamentiese beloftes (die woestynreis eindig en die Beloofde Land word ingetrek) in vervulling. Psalm 23 gaan in vervulling en ons hoor dit in ons teks. Die Lam wat geslag was en opgestaan het, sal hulle Herder wees. Hy sal hulle siele verkwik deur hulle na die fonteine te lei. Hy sal al die trane van hulle oë afdroog.

Die hele tyd praat ons van "hulle", maar dit is tog ons waarna die Here se Woord hier verwys. Dit is tog die groot troos waaraan ons vashou, dat die wêreld nie ons woning is nie en dat ons as pelgrims op pad is om eendag ten volle by Hom te wees.

Sing: Psalm 23-1:2, 3

Ds. W van den Heever (Werner) (Gobabis)